

PAULO ME NIINÄCE LETA TIMOTI BAU ME

Paulo Timoti ne Jewablenige

1 ¹ Cane, Paulo, Keriso Yeesu me ätyepäneji biname gäne. Acejiyame, lui te mibibine niiya cabu ca nisechränuge, piyepu Yeesu Keriso, mine lui cabu me ngene atwana singi yaacranimusi, teepi te najujäsi cane ai kaakesea wawename. ² Timoti, ätrunga cabu ca lui căme băgrä gäte, cane mäame bau me yoogärenine. Acejiyame mime Babe piyepu Keriso Yeesu mime Yageyame, teeme miiji te mäame cabu lenajame, teepi owecu äbitame mäame täápume piyepu poode ceerame meebine.

Ire Cängena Walya Abiberäja täápume

³ Cane cääri naajenine maane Epeso babo cewe je lenajame, cane lipu uja naajepene, Makedoniya probins me liba lädepene. Poto biname cina peema Epeso je walya abiberäja ne ecenanenisi, maane miiji jibemepi teebibine. ⁴ Jejemepi teepi abmaläcemame teeme singi gidä mene täápume piyepu uuje saare bime ngii täápume, ingle naace popi teepi biname bine jaawenimusi pui poto cidi me mene atraname. Teepi puma cita ca lica jääpänusi Acejiyame me singi ne mime täápume, mine lui ne ätrunga taatu ca jääpänusi. ⁵ Cane ai mene naace name pi jicenine, egä mine miiji mimämu singi äbitename epu singi cama, lui te täduge jugi cäco ngene atwana cabu ca, ngenecu poode cabu ca piyepu toraca ätrunga cabu ca. ⁶ Poto biname cina kaake ca itu sicelyäremumesi ai mule bine, siige kuu cäco mene bine jitranenemisi. ⁷ Teepi puu singi abiberäja biname me äbitame Acejiyame me cotre ngalebora, nuuja gwidape teepi umle lica gemi, teepi ngena täápume jicemusi. Teepi supra cäco jicemusi, yepä teepi mene me ingle umle cäco.

⁸ Mine umle gemi, egä Moose me Cotre lui miiji gyene liba cängena yäacwetnusi. ⁹ Mine gone ngene ätrimela, egä cotre cina lui miiji mule biname bime täápume lica gemi, yepä eei bime täápume lui cina cotre bine jaatropengäjimusi, ätecija cäco biname bime täápume, Acejiyame

umle cäco piiyepu niiyaniya muleyame biname bime täápume, cuta eei bime täápume lui cina Acejiyame ne piiyepu teeme gwidape opo gaabe me lica yaacitusi, cuta eei bime täápume teeme mage babe bine lui cina budre me yaaglecimusi coo poto biname bine lui cina yaaglecimusi budre me, ¹⁰cuta eei bime täápume lui cina magebi rooriye bime mule yaacnusi nuuja biname cama lui teeme coga coo rooriye lica birige. Cotre cina cuta rooriye imäbägrä bime täápume lui cina teemeteme lacananinusi, piiyepu magebi ngulebägrä bime täápume lui cina peei yepä mule jaawenusi, cuta eei bime täápume lui cina biname bine aletname yaawadimusi, cuta lui cina walya waatromininusi, lui cina walya aitneja ne jiicusi, piiyepu iyeta lui cina poto mule jaawenimusi, lui mara gemi toraca abiberäja cabu ca. ¹¹Weene toracarage abiberäja ne Miiji Mene cabu ca jääpänuye, Acejiyame lui Mene näcäruji cane jajanemame. Miiji Mene lui babo jamyacu gyene, epucäco Acejiyame bau ca tädenige.

Acejiyame ne Eso Yäacäresi Teeme Owecu name pi

¹²Cane eso ecärenine Keriso Yeesu mime Yageyame ne, lui te kokre ituge ceera cane ai kaakesea wawename. Tabe nacatuji, egä cane toraca biname gäne, siige najuji teeme kaakesea wawename. ¹³Cane puu niinäcerage niiya mene tiicemäjemumene teeme poto cidi me, teeme binamewale bine sabe tewenenanemumene piiyepu seglecenanemumene, yepä Acejiyame te cebine owecu nawenuji, niiya daremu lica näcäruji, ingle pui padare cabu cäme ätrunga lica ge, peei name pi cane umle lica ge, cane ngena ne jewenujine. ¹⁴Mime Yageyame babo owecu ge cäme täápume, siige teeme pui owecu cabu ca cane kokre äbitujine Keriso ne ätrungame piiyepu singi äbitame iyeta ätrunga biname täápume. Ätrunga piiyepu singi lui eei biname bime tääpu myene, Keriso Yeesu cama lui cina yepä gemi. ¹⁵Ai lui toraca mene gyene, biname cina miiji acata, egä Keriso Yeesu lui täduji ai gawecewe cabu me niiya mule biname bine äsecrerame teeme mäpu cabu ca. Cane age säne baborage iyeta niiya mule biname bime cabu ca. ¹⁶Yepä Acejiyame te owecu nawenuji cebine, lui tage babo niiyarage biname, naace täápume Yeesu Keriso te cäme cabu ca aboclomtame, egä teeme owecu lipu baborage gyene. Yoo, lui biname cina pagege ätrunga acita Yeesu cabu siige iyeteta ireclota ne päpäna, teepi cäme cabu ca pa jääpänepesi Yeesu me owecu ne. ¹⁷Taba lui te iyeteta enajenige mope biname me, lui gyene yepä taatu Acejiyame, budre cäco piiyepu päpäna cäco, mine miiji teebine opo gaabe me acita piiyepu awepyeräja iyeta padare cabu. Ai mene lui toraca gyene.

¹⁸Timoti, cäme bägrä, mäame kaakesea gyene biname bine abiberäjame, cane ai leta cabu ngena yoogärinine. Maane liba ai ne jewenenite, piba toraca me äbitenige, biname cina lui Acejiyame me tagepogogo mene niinäce gaabe me jiicemepesi mäame poto cidi

me. Maane miiji teeme pui mene kokre cama oomlaname, siige piba maane miiji gäte cängena cubu iicaname walya abiberäja biname bine apremelame. ¹⁹Kokre cama joomlepi ätrunga ne piyepu niya mule gone jaawenute mäame ngenecu poode ne sabe wawename. Poto biname cina teeme ngenecu niya me ingele bine lica jäärngemusi ngene ca aglime, egä cine ngena niya ne ituge wawena, siige teepi teeme ätrunga bine yaabmalimusi. ²⁰Ai mule te itu läbitepi Humenus piyepu Aleksanda täápume. Cane teebibine itu lääyebtingtepene ätrunga ingele cabu ca, Satani me ime cabu laacitepene teepi piba abiberäjame, egä teepi niyaniya mene gone iicema Acejiyame poto cidi me.

Irecu Ätumutipeye Iyeta Biname bime täápume

2 ¹Yoo siige, cane baborage singi gäne weene Acejiyame bau me irecu ätumutame, teebine awejename cuta eso ceerame iyeta biname bime täápume. ²Weene miiji irecu ätumuta gawe mope biname bime täápume piyepu poto modamoda biname bime täápume mine piba bojäcu lenajame piyepu poode cama. Mine piba miiji Acejiyame ne cabu me wawena piyepu biname bine opo gaabe me acrana. ³Apu irecu ätumuta lui miiji gyene, piyepu Acejiyame mime Äsecrerayame ne ngenecu miiji me jaawenuge. ⁴Taba singi gyene iyeta biname bine niya cabu ca äsecrerame piyepu teepi umle äbitame, egä ngena gyene toraca. ⁵Yepä taatu Acejiyame pisi nyene, piyepu yepä taatu gyene, lui te biname bine teeme bau me ewadenemige. Pui lui biname gyene, Keriso Yeesu. ⁶Taba teeme ireclota ne iyemaluji iyeta biname bine kälyä wawename teeme niya mule cabu ca. Siige ai mule ca taba toraca padare cabu jewabudnituji, egä Acejiyame singi gyene iyeta biname bine niya cabu ca äsecrerame. ⁷Peei name pi Acejiyame te cebine najuji ätyepäneji biname täápume cane Miiji Mene ne acaname biname bime bau me, lui Israella biname lica gemi, piyepu teebibine abiberäjame, egä toraca ätrunga lipu gyene. Cane toraca mene jijenininine, walya lica otrominine.

⁸Cane singi gäne rooriye cina iyeta ätrunga maramara ingele cabu irecu ätumutame Acejiyame bau me; cane singi teepi ime awepengäjame toraca ngenecu cama irecu ätumutame, claabe cäco piyepu niyarage ngene atwanena cäco. ⁹Cuta piyepu ätrunga magebi cina gone oräre abasogära. Teepi miiji cängena cäbletääpe asigrera. Teepi gone abasogära bucurage kusa piyepu oplacmeläja gwidape ca, poto edingäli abasogära gwidape ca coo babo daremu cäbletääpe ca. ¹⁰Pätä ätrunga magebi cina miiji miijimiji mule waweneca, siige peei te teebibine jamyacu me jaawenimuge piyepu peei lui conocäco gyene magebi bime täápume, lui cina Acejiyame täápume mara me ituge äbita. ¹¹Magebi cina miiji bojäcu lenaja abiberäja padare cabu piyepu teepi miiji ätrunga ingele modamoda biname bine ätecija. ¹²Cane singi lica magebi te irecu ätumuta ngalebora

abiberājame coo mope biname me äbitame rooriye bime täápume, yepä tabe miiji bojäcu lenaja. ¹³Ingle naace popi Acejiyame te Adamu ne niinäce jewenuji, Eeba ne ingwe ca jowenuji, peei name pi rooriye te miiji mope biname me lenaja. ¹⁴Cuta Adamu ne lica engletnäjuji Satani te, yepä Eeba ne ongletnäjuji, siige tabe te Acejiyame me cotre ne jetropangtuji. ¹⁵Yepä, biname lui te ai gawecewe me niiya ne ecatuji, tabe magebi me cabu ca gyene, peei name pi magebi cina teeme cabu ca ireclota ne birige päpäna, teepi liba ätrunga cama, owecu cama, epucäco piiyepu cängena ngene atwana cama.

Mene Ätrunga Ingle Mope Biname täápume

3 ¹Ai iicana lui toraca gyene egä, “Laati te liba singi ätrunga ingle mope biname me äbitame, tabe singi miijirage kaakesea täápume.” ²Teeme cabu gone nuuja niya ne päpäna. Tabe miiji yepä taatu coga cama biname, tabe miiji teemämu awesongära piiyepu miijirage ngene atwanena cama lenaja, tabe miiji miijirage muleyame biname, tabe miiji biname bine mogobi waweneca piiyepu tabe miiji miijirage abiberäja biname. ³Tabe gone bucurage sice nänäja biname piiyepu arngi biname coo trängäli cama biname, yepä tabe miiji owecu cama piiyepu poode cama. Tabe rarekaake singisingi gone. ⁴Tabe miiji teeme mete biname bine cängena ire atwi, cuta teeme bägrä bine wawena teebine äteciyame piiyepu opo gaabe me acitame. ⁵Rooriye te liba äblicäco teeme mete biname bine ire atwi, tabe piba lipulipu Acejiyame me ätrunga ingle ne ire atwi. ⁶Tabe gone kirece ätrunga biname, ingle naace popi pepu biname te liba läbituge ätrunga ingle mope biname me, tabe mope babo läbituge, siige teebine Acejiyame te jaatranuge, Satani ne lipu jitranuji, tabe liba mope babo me äbituji. ⁷Cuta tabe miiji epu lenaja, egä ätrunga cäco biname cina teebine opo gaabe me yaacitusi. Tabe liba cängena lica lenaja, piba niiya mene jicemusi teeme poto cidi me, siige Satani me dici te joomluge.

Mene Ätrunga Ingle Ätityera Biname bime täápume

⁸Ätrunga ingle ätityera biname cina miiji miijirage muleyame lenaja ätrunga ingle mope biname te liiyepu. Teepi miiji toraca ngenecu cama biname. Teepi gone bucurage sice nänäja, gone rarekaake singisingi. ⁹Teepi miiji yepä taatu ngene atwana cama oomlana toraca mene ne, Acejiyame te lui ne tewabudnituji ätrunga poto cidi me. ¹⁰Teebiline miiji niinäce apicetnära. Teepi liba äsi pui cabu ca, siige teepi piba miiji birige peei kaakesea ne wawename. ¹¹Teeme cogawale cina cuta miiji miijirage muleyame cängena biname, conocäco taatu iyeta mule cabu. Teepi gone iicetna mule wawena. ¹²Ätrunga ingle ätityera biname cina miiji yepä taatu coga cama. Teepi miiji cängena ire atwi teeme bägrä bine piiyepu

iyeta mete biname bine. ¹³Lui ätityera biname cina teeme kaakesea cängena jaawenusi, biname cina teebibine opo gaabe me yaacranimus, teepi siige piba wälu cäco birige mene iicema Yeesu Keriso ne ätrungame.

Toraca Mene Ätrunga poto cidi me

¹⁴Cane ai mene liba yoogärenine, cäme ngene atwana singi pisi nyene mäame bau me watawata otnime. ¹⁵Yepä cäme otni liba däägudägu gyene, ai leta te piba meebine umle naawenenige egä mine Keriso me binamewale lipu lenajame. Mine ireclota Acejiyame me binamewale gemi, teeme ätrunga ingle gyene, lui te jibyetnininige piiyepu ewärimtenige toraca mene ne Acejiyame poto cidi me. ¹⁶Mine iyeta umle gemi, lipu baborage gyene ai toraca mene Acejiyame lui ne seboclomtuji mime ätrunga poto cidi me egä,

Keriso biname me tääpe ne ecatuji,

teeme budre cabu ca arpinenta te jewabudnituji,

egä tabe Yageyame gyene.

Acejiyame me mename seemo cina teebine jepänanujisi.

Teeme poto cidi me mene jejananemujisi iyeta poto ta.

Bucurage biname cina teebine jitrungujisi

iyeta poto ta ai gawecewe cabu.

Acejiyame te teebine ecatuji cabu me.

Walya Abiberäja Biname

4 ¹Aceji Seemo te pajecurage jiičenige, egä ceräcerägäabu padare cabu poto biname cina teeme ätrunga bine cire yaabmalecmepesi, siige gije cire labacitipesi walya seemo bine ätecijaname piiyepu niya cable bime abiberäja ne ingwe äcwime. ²Apu abiberäja ne cire yaacenanesi walya angletnejayame biname, lui cina ngene ca lica yaaglusi, egä teepi niya mule biname gemi. ³Teepi biname bine cire jiibananemepesi coga rooriye awadrecame cuta cire jaawenemepesi poto deedei cibi cude me. Yepä Acejiyame te iyeta deedei cibi bine ituge wawena loolo piiyepu cibi tääpume. Mine lui cina ätrunga biname gemi piiyepu umle ituge äbita toraca mene poto cidi me, mine eso cama ärngäjame piiyepu ärwäjame, ⁴ingle iyeta, Acejiyame lui bine ituge wawenetnäja, miiji gemi. Nuuja ne gone ägyi, yepä miiji eso cama iyeta waadena. ⁵Acejiyame te lipu ituge cude cäco me wawena iyeta cibi deedei bine piiyepu mine liba eso yäacärusi, ai neeneni ingle name pi iyeta cibi deedei miiji gemi cibi me piiyepu loolo me.

Umle Mene Timoti bau me

⁶Timoti, maane liba umleumle jaawenimute ai walya abiberäja poto cidi me ätrunga biname bine peema, piba maane Keriso Yeesu

me miijirage kaakesea bägrä gäte. Maane miiji cängena abiberäjepi Keriso bau ätrunga lipu gyene piyepu kokre joomlepi, maane lui toraca abiberäja ne ituge äcwetna, siige piba maane seemo ireclota cabu miiji naanajepi. ⁷Maane gone emä, gidä mene luma jicemimusi, ingle Acejiyame cäco papa mene gemi. Yepä maane miiji eei mule bine waweneca, lui cina mäame ätrunga ne babo jaawenusi. ⁸Biname te teeme tääpe ne liba jaapinicuge, peei lui miiji birige ai ireclota täापume. Yepä tabe liba eei mule bine waweneca, lui cina teeme ätrunga ne babo me jaawenusi, pui lui iyeteta miiji gyene, ingle peei te ireclota yääcäruge page padare täापume piyepu ciige padare täापume. ⁹Ai mene lui toraca gyene, miiji acata. ¹⁰Mine lagletnäjinago, mage kaakesea jaawenusi, ingle mine ituge mime ngene atwanena singi bine acrana ireclota Acejiyame bau me, lui te iyeta biname bine birige äsecrera niiya cabu ca, yepä toraca eei bine lui cina ätrunga cama gemi.

¹¹Jejananemepi, ebiberäjemepi ai poto cidi me. ¹²Nuuja te gone meebine mamye biname name pi äsädena. Pätä maane mäame ireclota cabu ca eboclomtepi teepi ngena iicaname piyepu wawename, teepi lipu owecu äbitame, ätrungame piyepu epucäco lenajame. ¹³Maane mäame kaakesea cabu ngenecu ecitepi, Oogäräneji mene ecnemepi ätrunga biname bime cabu me, bäärmä mene jegednemepi, ebiberäjemepi, ngälu cane pa lädepene peeyeme. ¹⁴Gone ai kaakesea ne yaabmalute, Aceji Seemo lui täापume umle piyepu kokre nääcärepä, niinäce gaabe ätrunga biname cina liba ime yaacranepesi mäame papa cabu me piyepu Acejiyame me tagepogogo mene icana biname cina liba jicemepesi ai poto cidi me. ¹⁵Maane gone durau läbitute iyeta ai kaakesea wawename, yepä maane toraca ngenecu cama jewenepi, piba biname cina päpäname egä maane babo äbitenite. ¹⁶Maane ire, egä maane cängena naanajenige piyepu toraca mene ebiberäjennemite biname bine. Maane liba ai ne jaawenute iyeta padare cabu, maane ngälu cäco ireclota ne cire jepänepi piyepu lui cina mäame mene yäatecijemuge, teepi cuta ngälu cäco ireclota ne ire jääpänesi.

Timoti Lipu Lenajame Ätrunga Biname cama

5 ¹Moda ne gone drämä cama ablawa, yepä cängenarage eblawepi, epu mäame babe ne lipu yaablawute. Mamye rooriye bine epu jewenemepi mäame naane igane bine liiyepu, ²molyege bine mäame mage ne liiyepu, mamye magebi bine mäame ngulewale bine liiyepu, epucäco.

³Maane itityäremepi cuublacubla bine, lui bime binamewale lica gemi. ⁴Yepä liba cuubla me bägräwale coo daadewale piti nemi, teepi miiji abiberäja teeme inglewale bine ire atwime, Acejiyame te lipu ituge jaji. Mage babe cina lipu bägrä bine ire jaatwemusi, teepi cuta miiji peei ne

daremu wawena teebibine ire atwime, ingle ai lui Acejiyame me singi gyene. ⁵Lui cuubla me binamewale lica gemi teebine ire atwime, tabe teeme ngene atwanena Acejiyame bau me yaacituge, siige iyeta padare, ciye bimui, irecu lätumutanuge Acejiyame bau me ätityera ne päpäname. ⁶Yepä lui cuubla teeme singisingi täapume waanajuge, tabe puu ireclota onajenige, yepä seemo ireclota ngalebora tabe budre gwene. ⁷Maane ai mene jejananemepi teebibine, piba nuuja te äblicäco niya mene iicana teeme poto cidi me. ⁸Laati te liba lica ire atwema teeme inglewale bine, toraca eei bine teeme mete cabu lui cina icrajenige, tabe teeme ätrunga ne jääguyuge, siige teeme mule niyarage gyene ätrunga cäco biname bime mule cabu ca.

⁹Maane epu cuubla bine ngii acranecame ätityera päpäname, lui cina siksti kämäge cama piyepu yepä taatu rooriye cama ituge. ¹⁰Teepi miiji epu magebi, lui bime poto cidi me jicusi, egä teepi miijirage mule bine ituge waweneca, teeme bägrä bine cängena ituge waadena, cuta miijirage mogobiyame, gloose cäco owecu mule ituge waweneca poto ätrunga biname bime täapume, cuta ituge ätityera lui cina mäpu cabu yaacrajuge. Teepi siige epu cuubla gemi, lui cina teeme ireclota yaacranepesi iyeta miijimiji mule bine wawenecame.

¹¹Yepä gone mamye cuubla bine ngii yaacranimute ätrunga ingle cabu ca ätityera ne päpäname, ingle singisingi ngene atwa-nena te liba joomlemuge, teepi Keriso ne kaake ca yäacelyärusi, siige latejecläjininusi. ¹²Teepi apu kaake me jaawenusi teeme niinäce mene Keriso me kaakesea wawenecame piyepu rooriye cäco lenajame, siige teebibine cirege ablaweja. ¹³Teepi cuta mete bine yaacnemusi, papa lenaja ca padare ne yaapirusi. Cuta peei taatu lica, teepi licetna mule yaacnusi, poto biname bime mule cabu labrabinininusi. Piyepu teepi mene jicemusi, lui bine teepi lica cirege iicema. ¹⁴Peei name pi cane singi gäne mamye cuubla cina cääri rooriye awadrecame, bägrä ärngecame piyepu mete gwidape bine ire atwime, piba mime äciseräjayame biname cina äblicäco mibibine aitneja. ¹⁵Cane ai naace name pi bii jicine, ingle poto cuubla cina uja ituge teeme ätrunga bine abmaläcema, siige Satani ne icwetnenisi. ¹⁶Liba ätrunga magebi yepä me coo ätrunga rooriye yepä me cuublacubla piti nemi teeme ingle cabu, teepi miiji teebibine ire atwema. Ai mäpu gone ätrunga ingle biname bine ceera, piba teepi kälyä gemi ire atwemame lui cuublacubla taatu gemi.

¹⁷Ninäce gaabe ätrunga biname lui cina miijirage mope biname me yaacrajuge, teepi ibibi gemi neeneneni gääbu daremu acata, toracarage eei biname lui cina bääirmi jaagednanemusi piyepu yaabiberäjimusi. ¹⁸Oogäräneji mene te nata jicenige egä, “Lui kau te wiiti kuu bine jäämungäjemuge, gone tage jäätäyuye tabe loolo cäco kaakesea wawename,” piyepu cuta jicenige egä, “Kaakesea biname te miiji ge teeme daremu ne päpäna.”

¹⁹Lui biname te ätrunga ingle babo biname ne jaaitnäjuge, gone teebine ätecija, liba neeneni coo nesae biname lica gemi aitnejame, egä toraca gyene. ²⁰Lui biname cina niiya mule jaawenimusi, biname bime sobe cabu yaablawimute, piba poto cina wälu läbitininusi.

²¹Acejiyame piyepu Keriso Yeesu piyepu äjäcräneji mename seemo, teeme opo gaabe cane naajenine maane căme mene ibi wawename. Gone nuuja ne owelale jaawenute, yepä maane miiji iyeta ätrunga biname bine yepä ibi yaablawäjemute. ²²Gone naalocnicuge ime acitame biname cabu me teebine babo biname me wawename. Gone lalenglecäjute nuuja biname bime niiya mule cama, yepä maane epucăco naanajepi.

²³Niye taatu gone yäänäjimute, waina niye cuta mati yaanute mäame came niiya name pi piyepu pitapita name pi.

²⁴Bucurage biname cina pajecurage niiya mule yaacnemusi, siige teeme niiya mule bine niinăce gaabe me jaatranimusi. Lui cina niiya mule ogă yaacnemusi, ingwe ca pajecu me läbitininusi atrana täapume. ²⁵Cuta pepu gyene, poto biname bime miiji mule bine pajecurage jääpänimusi, cuta lui cina păpăna căco gemi page, teepi äblicăco ämlităneji lenaja.

Mene Aletnăneji Biname bime poto cidi me

6 ¹Ätrunga biname lui cina aletnăneji biname gemi, teepi miiji teeme modamoda biname bine opo gaabe me acrana, piba nuuja te äblicăco niiya mene iicana Acejiyame poto cidi me piyepu mime abiberăja poto cidi me. ²Laati bime modamoda biname ätrunga biname, teepi gone ätecija căco äbita teeme täapume, ingle teepi yepä ätrunga cama gemi. Pătă teepi miiji teeme kaakesea căngena wawena, ingle teeme modamoda biname teeme kaakesea cabu ca lui daremu jääpănusi, teepi teeme miijirage ätrunga binamewale gemi.

Maane miiji biname bine apu ebiberăjemepi, kokre ecăremepi teepi wawenetnăjame.

Walya Abiberăja piyepu Toraca Dogwe

³Laati te liba yaabiberăjimuge mara abiberăja, lui yepä lica gyene mime Yageyame Yeesu Keriso me toraca mene cama cuta mime abiberăja cama ätrunga poto cidi me, ⁴tabe mope babo me läbituge piyepu tabe umle căco biname birige. Teeme niyarage singi pisi nyene mene poto cidi me äcelame piyepu mene abajame. Ai te biname bine jaawenimuge ire patre aglime, arngi me, niyaniya mene nuuja biname ne jajime, niyarage ngene atwa-name, ⁵äcelename. Apu muleyame biname cina mopemuli căco gemi; teepi toraca mule ne ituge abmala. Teepi apu angi ge, egă ätrunga lui gaabe gyene dogwe păpăna täapume.

⁶Yoo, ätrunga gaabe te biname ne toraca dogwe me jaawenuge, tabe liba ngene ca jaagluge, teeme ngena pisi nyene. ⁷Mine liba aplimla,

mine nuuja gwidape cama lica otni; mine liba budre pagege, mine nuuja gwidape ne lica acana, ⁸ peei name pi mime liba deedei piyepu cäbletääpe piti nemi, mine miiji bojä agi. ⁹ Yepä lui cina singi bucurage gwidape täápume, teebibine birige angle-tneja piyepu Satani me dici te jaabaletnecimuge. Budubuduma piyepu niyarage singi cina teebibine joomlemimusi, ngälu siige iyeta niiya cabu yaacranuge. ¹⁰ Rarekaake singisingi lui ingle gyene iyeta maramara niiya mule bime täápume. Rarekaake ärngema cabu bucurage cina ituge teeme ätrunga bine apesera, siige bucurage mäpu cina teeme ngenecu bine jaagadäjemusi.

Ätrunga Biname me Ireclota

¹¹ Timoti, maane lui Acejiyame me biname gäte, cude padare naanajepi apu mule cabu ca. Maane ecrinäjemepi conocäco lenajame, Acejiyame ne opo gaabe me acitame, Keriso ne ätrunga-me, owecu me, ämyemutaname cewe oocana cabu, owelaamelame biname me lenajame. ¹² Maane ätrunga gaabe cabu cängena uuwamepi, siige iyeteta ireclota ne ecatepi, lui ireclota täápume meebine ituge ala asogleca, maane liba biname bime sobe cabu mäame ätrunga ne cängena eboclomtujite. ¹³ Acejiyame lui te iyeta gwidape bine ireclota ecäranenenemige, piyepu Yeesu Keriso lui te Pontiyo Pilato me opo gaabe ätrunga ne jewabudnituji, cane teeme opo gaabe naajenine ¹⁴ egä maane äteciyame, meebine ngena ituge jaji. Gone naatramuge ai cängena wawenecame ngälu mime Yageyame Yeesu Keriso te cire tacnenutepi. ¹⁵ Acejiyame lui te miiji gyene, lui yepä taatu gyene biname bine waadename, iyeta mope biname bime Mopeyame gyene, iyeta yageyame bime Yageyame gyene, tabe lui padare ne ecituji, tabe piba cirege teebine cääri ätyepa. ¹⁶ Acejiyame, tabe taatu gyene budre cäco. Tabe epu apaclyera cabu enajenige, egä nuuja te äblicäco teeme gome otni. Nuuja biname te lica ituge teebine päpäna cuta äblicäco päpäna. Mine miiji teebine opo gaabe me acitename, piyepu tabe kokre cama lenajame iyeteta. Ai lui toraca mene gyene.

¹⁷ Jejemepi ätrunga ingle cabu lui gwidape dogweyame gemi, teepi gone mope modamoda me äbita piyepu gone ngene atwa-nena acrana watawata dogwe cabu me. Pätä teepi miiji teeme ngene atwana acrana Acejiyame cabu me, lui te nicäraninuge iyeta, mine lui täápume singi mine gege lenajame. ¹⁸ Maane jejemepi teepi miijimiji mule wawenecame, siige piba pui miijimiji mule lui teeme dogwe gemi. Teepi miiji ceera biname lenaja, temiji kupae wawena poto biname bine. ¹⁹ Teeme apu mule lui dogwe pana gemi teeme ciige lenaja täápume, siige teepi toraca ireclota ne jääpänusi.

²⁰ Timoti, maane kokre joomlepi meebine ngena ituge ceera maane ire atwime. Maane cude padare lenajame budubuduma mene cabu ca piyepu cuta walya abiberäja cabu ca, lui täápume biname cina jaangemuge, egä

umle mene gemi. ²¹Poto cina ituge iicana, egä teeme pui umle puga ge, yepä teepe siige teeme ätrunga bine ituge apesera. Acejiyame me miiji te weeme cabu lenajame.

Cane ngii Paulo. Siige căme mene ngälu peese.